

Regurdientschas dil temps da scola

La proxima «da cuminonza a Ruschein» ei dedicada a regurdientschas dalla scola

■ (cp) Ina seregorda che siu polisch e siu letgagroma eran savens blaus oradem, ed ella vesa quels palpadets da tenta aunc oz avon ses egls interns. L'auter survegn uss aunc pial gaglia sch'el patratga vid il sgriziar dils grefels sin las tablas che mintga scolar veva. La proxima occurrenza «da cuminonza a Ruschein – la sera dils treis», vendergis ils 3 da matg, ei dedicada a regurdientschas dalla scola. Ei dat ina sera da MiSaPa – mintgin sa participar cun raquintar – mo negin sto. Ins sa era vegnir e semplamein tedlar.

Regurdientschas dil temps da scola dat ei era dallas pausas. Ei deva buobs che currevan igl unviern or dalla stiva da scola scochemai ch'il scolast veva getg «pausa». Els mavan da pausa dabot cun skis tochen giu Calduns – e vevan da vegnir ensi a pei. Ed ei deva mattatschas che mavan bugen mintga sera a rusari – buca ton pervia dils paternos, mobein per ver ina stgisa da saver ir intec per las vias aunc suenter tscheina.

Tgi che va a sentupadas da classa sa co quei ei cun las regurdientschas da pli baul. Ina persuna entscheiva, in'otra secundescha, ils ins gin «exact aschia era ei», auters scolan il tgau e manegian «da quei sai jeu nuot» ni ch'els han arcunau en lur tgau tut in'otra versiun dalla medema historia. Regurdientschas ein in

enorm scazi, biars manegian schizun che quei seigi il sulet scazi che negin sappi prender da nus. Interessant eis ei era dad observar tgei che las regurdientschas fan cun nus – e nus cun ellas. El mender cass sveglian ellas aunc adina resentiments e ravgias. El meglier cass pon ellas giavinar neunavon in surrir.

Alla sera «da cuminonza» ha tut plaz ch'ha da far cun regurdientschas dil temps ch'ei era dad ir a scola. Forsa che ina ni l'otra prelegia in concept ch'era

reussius tut aparti bein, forsà che in ni l'auter sa ordado aunc parts dalla poesia da «La pugniera», forsà che zatgi vegn cun in vegl attestat e raquenta da larmas da gretta ni plascher en connex cun ina nota. Sco adina ein era persunas d'ordeifer beinvegnidas. E secapescha che tgi che vul astga era raquintar per tudestg da regurdientschas dalla scola.

«Regurdientschas dalla scola», vendergis, ils 3 da matg 2019 allas 20.15, casa da scola Crestas, Ruschein. Dapli sin www.dacuminonza.ch

*Regurdientschas
dalla scola*





*Ina sera da MiSaPa
(Mintgin Sa Participar)!*

*Tgi che vul lai reviver – per
romontsch oder auf deutsch –
reminiscenzas dil temps da
scola, raquenta da notas e
fazzas, prelegia in concept
ni recitescha poesias mai
emblidadas ...*



ABC